

## It'est su pronùmene

Unu pronùmene est un'elementu linguìsticu impreadu a su postu de un'àteru o de àteros nùmenes segundu sa funzione deitàca.

Sa prima cosa chi tocat de fàghere est a ischire s'ogetu o cumplementu de sa frase. Custu cumplementu inditat a chie o a ite s'atzione de su verbu est direta. Pro la fàghere prus fàtzile, depimus partzire sos cumplementos in duas categorias printzipales: cumplementu diretu e cumplementu indiretu.

Pro cumprèndere comente funzionant sos pronùmenes in sardu tocat de ischire sa diferèntzia intre su cumplementu diretu e indiretu.

### Cal'est sa diferèntzia intre su cumplementu diretu e su cumplementu indiretu?

- Su cumplementu o ogetu diretu est sa parte de sa frase chi ritzevit in manera direta s'atzione de unu verbu transitivu

Esempru: sos pitzinnos abbàidant **sa televisione**

Su cumplementu diretu tenet vàrias propiedades:

1. respondet a sa pregunta: “ite?” o “a chie?”
  - M'agradat a bìdere **s'ispetàculu**. *Ite* mi praghet a bìdere?
  - Su ditadore at conchistadu **sa Gàllia**. *A chie* at conchistadu su ditadore?
2. Si podet sustituire semper cun sos pronùmenes àtonos *lu/ddu, la/dda, los/ddos, las/ddas*:
  - m'agradat a lu bìdere (s'ispetàculu)
  - su ditadore l'(a) at conchistada (sa Gàllia)
  - m'agradat a los bìdere (sos ispetàculos)

- su ditadore las at conchistadas (sas terras de sa Gàllia)

3. Su cumplementu diretu podet èssere formadu dae:

- unu sintagma numenale: Pedru at iscritu **sos apuntos**
- unu pronùmene: Sa mama e su babbu **lu** cherent

Pro cumprèndere a ite serbint sos pronùmenes, tocat a leare in cunsìderu sa capatzidade de sìntesi comunicativa in una frase comente custa: *In butega mi còmporo unu paninu, in domo mi preparo su paninu e in su traballu mi màndigo su paninu.*

In custa frase sa paràula *paninu* si ripitit tres bortas e est una redundàntzia chi podet èssere sustituida dae su pronùmene àtonu C.D. **lu**: *in butega mi còmporo unu paninu, in domo mi lu preparo e in su traballu mi lu màndigo.*

Esempros de cumplementu diretu:

- Chèrgio bìdere **domo tua**
- Apo passadu **s'esàmene**
- Su ditadore at conchistadu **paritzos territorios**
- Pedru màndigat **pane**
- (nois) Abbarramus **a fraude tuo**

Si podet finas sustituire una frase intrea:

1. pregunta: *a l'ischis ite ora est?*

Resposta: *no, no l'isco* (it'ora est)

Pronùmenes de cumplementu diretu	Direct object pronouns
MI	ME
TI	YOU
LU	HIM/IT (M.Sing.)
LA	HER/IT (F. Sing.)
NOS	US

BOS	YOU
LOS	THEM (M. Sing.)
LAS	THEM (M. Sing.)

Carchi esempru simple de pronùmenes de cumplementu diretu:

1. Giuanne **m'**est abbarrende a domo
2. Maria **ti** so bidende bene
3. Leo su libro => **lu** leo
4. Màndigo sa sìndria => **la** màndigo
5. Nois non resessimus a iscriere in russu, a **nos** agiuas pro praghere?
6. Si falades a pratza, **bos** cùmbido
7. Abbàido su tempus => **I'(u)** abbàido
8. Difendet a sos animales => **los** difendet
9. Leghet sas retzetas => **las** leghet

#### atintzio:

Non si aunit su pronùmene a su verbu comente in italiano e ispaniolu. Esempru:

1. cun s'imperativu: Màndiga·lu; tzèrria·lu...
2. cun su geründiu: Mandighende·lu; tzerriende·lu...

Cun su verbu a s'infinitu, francu casos raros, su pronùmene andat postu primu de su verbu. esempru:

Pregunta: *A la potzo abbaidare sa televisione?*

Resposta: *eja, la podes abbaidare*

Pregunta: A lu potzo leare su libru?

Resposta: *eja, lu podes leare*

## Cumplementu indiretu

Su cumplementu indiretu ìnditat s'ogetu de s'azione chi su verbu esprimit ma càmbiat in s'istrutura e est collegadu a su verbu cun una prepositzione: a, de, pro, contra, cun...

In sardu lu podimus reconnoschere ca si podet sostituire cun *li/ddi* e *lis/ddis* e in tzertos casos cun *si*.

Giuanne at pagadu sa domo de sa mama = *li at pagadu sa domo*

Apo naradu a sos pitzinnos de non giogare = *lis apo naradu de non giogare*

## Ischema de sos pronùmenes cun sa prepositzio *a*

Primu de su verbu (tònicos)	A pustis de su verbu (àtonos)
<b>singulare</b>	<b>singulare</b>
mi	a mie
ti	a tie
li	a isse/a
<b>plurale</b>	<b>plurale</b>
nos	a nois
bos	a bois
lis/ddis	a issos/as

## Esempros

Primu de su verbu	A pustis de su verbu
<b>singulare</b>	<b>singulare</b>
(tue) mi faeddas	(tue) faeddas a mie

(deo) ti faeddo	(deo) faeddo a tie
(deo) li faeddo	(deo) faeddo a isse/a
<b>plurale</b>	<b>Plurale</b>
(tue) nos faeddas	(tue) faeddas a nois
(deo) bos faeddo	(deo) faeddo a bois
(deo) lis faeddo	(deo) faeddo a issos

In custas frases chi sighint s'impren de sos pronùmenes est pleonàsticu:

1. a **mie mi** praghet sa mùsica
2. a **tie ti** mancat sa boghe
3. A Bartzellona andadu **bi** ses?

### **Ischema de sos pronùmenes cun sa prepositzioone *de***

Singulare	plurale
de mene	de nois
de tene	de bois
de isse/a	de issos/as

### **Esempros:**

1. A seguru b'at gente prus istudiada **de mene**
2. Iscriere in sardu faghet **de mene** un'iscritore sardu
3. A cùrrere so peus **de tene**
4. No apo faeddadu **de tene**
5. Deo so mègius **de issa**
6. Tue ses prus bellu **de isse**
7. Chistionant **de nois!**
8. Sos professores sunt faeddende **de bois**
9. Cuddos sunt prus intelligentes **de issos**
10. Sa paghe est intro **de issas**

### **Ischema de sos pronùmenes cun sa prepositzioone *pro***

Singulare	plurale
pro mene	pro nois
pro tene	pro bois
pro isse/a	pro issos/as

### Esempros:

1. **Pro mene** sa chistione est diferente
2. custu regalu est **pro tene**
3. **pro isse/a** sa fide est una chistione personale
4. su sardu **pro nois** est una limba normale
5. Giuanne m'at dadu custa cosa **pro bois**
6. **pro issos/as** ant pèrdidu pro neghe de su portieri

Sa prepositzioone *pro* in sardu cando no at balore dativale podet èssere sustituida dae sa prepositzioone impròpia *segundu*:

*segundu mene; segundu tene; segundu isse/a...*

### Ischema de sos pronùmenes cun sa prepositzioone *dae*

Singulare	plurale
dae mene	dae nois
dae tene	dae bois
dae isse/a	dae issos/as

### Esempros:

1. Ite cheres **dae mene**?
2. So a tesu **dae tene**
3. **Dae isse/a** benint totu sas crìticas
4. Custos traballos sunt istados fatos **dae nois**
5. **dae bois** sos pitzinnos ant connatu sa passione
6. at otènnidu **dae issos/as** un incàrrigu importante

### Ischema de sos pronùmenes cun sa prepositzioone *cun*

Singulare	plurale
cun megus	cun nois

cun tegus	cun bois
cun isse/a	cun issos/as

**Esempros:**

1. depes bènnere **cun megus**
2. depo andare **cun tegus**
3. so **cun isse/a** in sa vetura
4. a bi cheres giogare **cun nois?**
5. bèngio **cun bois** sa chida ch'intrat
6. ando **cun issos** como